

高斋漫录

曾慥

文硕阁

wenshuoge.com

目录

关于我们	3
提要	5
高齋漫錄全文	6

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

提要

《高齋漫錄》一卷，宋曾慥撰。慥有《類說》已著錄，《類說》自序以為：小道可觀，而歸之於資治體。助名教，供談笑，廣見聞。其撰述是書，亦即本是意。上自朝廷典章，下及士大夫事蹟，以至文評詩話詼諧嘲笑之屬，隨所見聞咸登記錄。中如給舍之當服頰帶，不歷轉運使之不得為知制誥，皆可補史志所未備。其徵引叢雜，不無瑣屑，要其可取者多，固遠勝於游談無根者也。陳振孫《書錄解題》載此書二卷，世尠流傳。近時曹溶嘗採入《學海類編》，而祇存五頁，蓋自他書抄撮，姑以備數，遺漏宏多。今從《永樂大典》各韻中摺摭裒輯，視溶所收，多逾什之三四，其或溶本有之，而《永樂大典》失載者，亦參校補入。畧用時代銓次，合為一卷，雖未必慥之完帙，然大畧亦可睹矣。

高齋漫錄全文

今人秘色磁器，世言錢氏有國日，越州燒進為供奉之物，不得臣庶用之，故云秘色。嘗見陸龜蒙詩集越器云：“九秋風露越窑開，奪得千峰翠色來。好向中宵盛沆瀣，共嵇中散鬪遺杯。”乃知唐已有秘色矣。

仁宗時，度支金郎中君卿年十九，時與其兄君祐郊居。挾策野外，遇田家有醉鬪而傷者，仇人尤而執之，告縣曰：“是金秀才呼僮毆之也。”縣大夫擊械君卿，欲正其罪，君卿不能力爭。吏具文案上，忽有大風來，擺捲文書乘空去，衆訝焉。明日復具上，大風復掣去如前。又明日，復然。大夫驚怪曰：“豈非此儒生當貴達乎？”解而遣之，後四年第六人及第。熙寧中，君卿以廣西轉運使致仕，終于其家。

熙寧中，上元宣仁太后御樓觀燈，召外族悉集樓上。神宗皇帝數遣黃門稟曰：“外家有合推恩，乞疏示姓名，即降處分。”宣仁答云：“此自有所處，不煩聖慮。”明日上問何以處之，宣仁答曰：“大者各與絹兩匹，小兒各與乳糖獅子兩箇。”時內外咸歎仰后德為不可及也。

歐公作王文正墓碑，其子仲儀諫議送金酒盤醢十副、注子二把，作潤筆資。歐公辭不受，戲云：“正欠捧者耳。”仲儀即遣人如京師，用千緡買二侍女并獻。公納器物而却侍女，答云：“前言戲之耳。”蓋仲儀初不知薛夫人嚴而不容故也。

文潞公嘗戲云：“某平生作官，趕家僕不上，方為從官時，家僕已呼僕射，比為宰相，渠先為司徒矣。近年貴人僕以僕射司徒為卑，小則稱保義，又或稱大夫也。”

熙寧初行新法，諸路使者率用，一時新進之士大理寺丞李察為河北提舉，常平頗事風采。時文潞公守北門，思欲折之。察年少侏儒，公俟其來，于廳事特設高脚椅子。察進謁盤跚久不能就坐，公顧左右，徐曰：“抱上寺丞。”察慚沮而退。

江鄰幾雜誌云：陳公執中，嘗館伴北使，使人問儀鸞司緣何得名，陳無以對。或云，隋大業中鸞集於供帳庫屋，遂名云。

熙寧殿試改用策，謂比詩賦有用。不知士人計較得失，豈敢極言。時政自取黜落，是初入仕已教之謫也。況登科之初，未見人材，及後仕宦，則材智、聲名、君子、小人、貴賤分矣。不必須殿試策以別人才，人主燕閒時，於其等輩廣訪備聞，然後博記而審察之，天下無遺材矣。

鄧潤甫聖求元豐中為中書舍人，兼太子詹事，泰陵嗣位，以甘盤之舊入翰林為學士，及以事外補。林子中希為中丞，上章營救，其畧曰：“先帝西垣之詞客，十載于茲，陛下東宮之舊臣，一人而已。”上不聽。後數年，召為兵部尚書。時范純夫祖

禹為內相，蔚有時望，與鄧公同知貢舉。引試第二場間，忽有中使宣押學士拜尚書左丞，范公方冠帶迎肅，中使曰：“宣押鄧學士，非范學士也。”鄧俄頃上馬，廻鞭揖諸公，頗有德色，數日以病卒于位。黃道夫常為祭文云：“中臺三月功名已遂，於推揚東府，數宵魂魄，俄歸於寂寞。”道夫自謂精切，戲曰：“此文可書之聖求門右。”章子厚惇笑曰：“聖求生為執政，死乃作桃符矣。”當時傳以為笑。

王荊公《五經義》初成，裕陵嘗問曰：“《禹貢》稱導淮自桐柏，導渭自鳥鼠同穴，至導河但云積石，不言自何也。”荊公無以為對。

王荊公一日見婢持練帛付外浣凍，公戲作謎云：“雖居色界中，不染色界塵。一朝解纏縛，見性自分明。”

王荊公在鍾山與客對棋云：“彼亦不敢先，此亦不敢先。惟其不敢先，是以不敢爭。惟其不敢爭，故能入於不死不生。”客莫曉其意，公曰：“此持棋謎也。”

王荊公游山，題壁云：“欲據而食又無木，欲飼吾蠶又無木。有木則利用刑人，無木則不可伐而燒。”乃“安石至此”四字。其後林震遊揚州平山堂，題壁曰：“競競知其為震來也。”同行宋高輒書其旁曰：“不可。”衆莫曉其義，高曰：“高來不可，低來不可。”客大笑。

王和父守金陵，荊公退居半山，每出跨驢從二村僕。一日入城，忽遇和父之出，公亟入編戶家避之。老姥自言病店，求藥。公隨行偶有藥，取以遺之。姥酬以麻線一縷，云：“相公可將歸，入事相婆也。”公笑而受之。

元豐中，王岐公位宰相，王和父尹京，上眷甚渥，行且大用。公乘間奏曰：“京師術者皆言，王安禮明年二月作執政。”神宗怒曰：“執政除拜由朕，豈由術者之言，他日縱當次補，特且遲之。”明年春，安禮果拜左丞，珪曰：“陛下乃違前言，何也？”上默然久之，曰：“朕偶忘記，信知果是命也。”

王相珪當國，有故人至政事堂，公問勞甚厚。其人宦遊不遂，有憔悴可憐之色，時用郊恩改章服，公曰：“吾友蹇連歲久，且喜近錫章服。”故人笑曰：“某舊着綠時，只是清貧。自着緋後，轉更赤窮。”諸公聞堂，為之絕倒。

馮公京為樞密使，嘗薦王鞏可用，王荊公安石曰：“鞏止是一小男女，陪涉馮京，故薦之。”馮公曰：“王鞏與臣陪涉，誠如安石所言，若以為小男女，則鞏戊子生。”上變色久之，神宗皇帝戊子生故也。

蔡懋為馮公京之壻，馮薨于位，泰陵車駕臨奠。懋衰經雜於馮氏子弟間，厲聲呼曰：“陛下，臣父屈死。”上驚愕，問之，乃懋。自是知持正之冤，而惜其死。

元祐初，溫公拜相，更易熙豐政事。荆公在鍾山，親舊恐傷其意，不敢告語。有舉子自京師歸，公問：“有何新事？”對曰：“近有指揮，不得看《字說》。”公曰：“法度可改，文字亦不得作乎？”是夜，聞公繞牀行至達旦，於屏上書“司馬光”三字，凡數百，其胥次不平之氣槩可見也。

司馬溫公與蘇子瞻論茶墨俱香，云：“茶與墨者，正相反。茶欲白，墨欲黑。茶欲重，墨欲輕。茶欲新，墨欲陳。”蘇曰：“竒茶妙墨俱香，是其德同也。皆堅，是其摻同也。譬如賢人君子黔皙美惡之不同，其德摻一也。”公笑以為然。（案此條據學海類編增入）

呂相微仲當國，豐相之為諸曹侍郎，凡數月不至。相府公寄聲云：“相之久不相過，頗有欲面言者。”後半月，相之纔往見，語不及他，但叙寒暄而已。至欲上馬，徐云：“寡欲可以近道。”相之唯唯而去。

范師厚曰：“忠宣公元祐初自慶帥被召，給事中遂執政，其弟德孺代守慶。一日，德孺有書論邊事，公以書答之云：‘大輅與柴車爭逐，明珠與瓦礫相觸。君子與小人鬪力，中國與夷狄較勝負。不惟不可勝，兼亦不能勝。雖勝亦非也，弟其思之。’”

祖宗故事，不歷轉運使，不除知制誥。蘇子容頌自修起居注，出為淮南轉運使，未幾召還，遂知制誥。

三蘇自蜀來，張安道、歐陽永叔為延譽於朝，自是名譽大振。明允一日見安道，安道問云：“令嗣看甚文字？”明允答以軾近日方再看《漢書》，安道曰：“文字尚看兩遍乎？”明允歸以語子瞻，子瞻曰：“此老特未知世間人尚有看三遍者。”安道嘗借人十七史，經月即還，云：“已盡閱。”其天資彊記，數行俱下，前輩宿儒罕能及之。

東坡聞荆公《字說》新成，戲曰：“以竹鞭馬為篤，以竹鞭犬有何可笑。又曰鳩字從九從鳥，亦有證據，詩曰：鳴鳩在桑，其子七兮。和爺和娘恰是九箇。”

蘇子瞻任鳳翔府節度判官，章子厚為商州令，同試永興軍進士劉原父為帥，皆以國士遇之。二人相得歡甚，同游南山諸寺。寺有山魃為祟，客不敢宿，子厚宿，山魃不敢出。抵仙游潭，下臨絕壁萬仞，岸甚狹，橫木架橋。子厚推子瞻過潭書壁，子瞻不敢過，子厚平步以過，用索繫樹躡之上下，神色不動。以漆墨濡筆，大書石壁上曰：“章惇、蘇軾來游。”子瞻拊其背曰：“子厚必能殺人。”子厚曰：“何也？”子瞻曰：“能自拚命者，能殺人也。”子厚大笑。（案此條自抵仙游潭句以下，原本脫去，今據《學海類編》補入。）

禪林有食不盡物，皆投大釜中煮之，名谷董羹。東坡所用乃此事也，亦前人所未用。

東坡作溫公制詞云：“執德不回，常用社稷為悅。以死勤事，坐致股肱或虧。”或問坡曰：“溫公豈曹操之徒耶？”坡愕然問其所以，客曰：“社稷豈所可悅者？”坡笑改曰：“用安社稷為悅。”

東坡嘗謂錢穆父曰：“尋常往來，湏稱家有無。草草相聚，不必過為具。”一日，穆父折簡召坡食晶飯。及至，乃設飯一盃、蘿蔔一碟、白湯一盞而已，蓋以三白為晶也。後數日，坡復召穆父食毳飯。穆父意坡必有毛物相報，比至，日晏並不設食，穆父餒甚。坡曰：“蘿蔔湯飯俱毛也。”穆父歎曰：“子瞻可謂善戲謔者也。”（案此條據《學海類編》增入。）

俗語云：“借書與人一癡，借得復還為一癡。”嘗力辨此語，以為有無相通，義也，貸而必還，禮也，尚何癡。後果見王樂道從錢穆父借書一帖云：“出師頌書，函中最妙絕。古語云：借書一甌，還書一甌，欲兩尊奉獻，以不受例外物，固不敢陳續。”後又覽《唐韻》甌字下注乃云：“古者借書。以是盛酒果。”知非癡字也，故予有送還考古圖詩云：“懸知插架有萬軸，頗恨送還無一甌。”用此事。洪駒父又云：“癡甌二事兩出，疑癡字刻薄子妄改爾。”

劉貢父嘗見一士人口吃，戲作謎云：“本是昌徒，又為非類。雖無雄材，却有艾氣。”東坡曰：“貢父可謂滑稽之雄也。”傅欽之為御史中丞，嘗有章論劉仲馮。一日，貢父邂逅見之，問曰：“小姪何事，敢煩臺評。”欽之慚云：“三平二滿文字。”貢父笑曰：“七上八下人才。”

南唐有畫，黃頭子數十枚集于風枝之上，山谷題云：“蒿下蹄間，（案：蹄間原本作啼間，文義未詳，考黃庭堅集注，一作蹄，蓋取蹄涔之意，與下飲字相關，今從之。）適燕飲啄。（案：本集適燕作斥鷃。）爭雄穹枝，竿網將作。”造語奇古，然詠黃雀亦可。徐師川亦題云：“禽鳥之名，多不可紀，白頭稱公，黃頭稱子，羣飛且鳴，是將鬪矣。”又云：“禽之至微，勇而善鬪，竟亦何所爭，人為之勝負。”

彭器資元祐之末為吏部尚書，章子厚拜相，召至國門，從官並出郊迎。器資為人剛直，不少貶議者，以謂總領從官出迓宰相，既非私謁，亦未為過也。在九江數月，楊樂道待制經過，云：“某與公皆非忤於人世者，他日當同職事，然某先往，公亦繼來。”器資愕然。一日在廳事，忽睹黃衣人若今之健步者，持公牒立庭下。公命左右皂隸承接，皆曰不見，公叱之，乃謬為承接之狀，鞠躬以進。公披牒卷而懷之云：“來日食後便行。”即入內，區處家事，作書別親舊，又作頌與宋夫人訣別。次日午後，無疾而逝。或曰：器資若了達理性，則其去當無影響。又若去登仙，必

有道侶來迎。健步持檄，得非去為神矣乎。

章公惇罷相，俄落職，林公希為舍人，當制，制詞云：“悻悻無大臣之節，怏怏非少主之臣。”章相寄聲曰：“此一聯無乃太甚。”林答曰：“長官發惡，雜職棒毒，無足怪也。”（案此條據《學海類編》增入。）

崇寧初，蔡京用事。章公惇謂客曰：“蔡元長必行三舍，奈何？”客曰：“三舍取士，周官賓興之法，相公何為不取？”章曰：“正如人家有百金之產，以其半請門客教弟子，非不是美事，但家計當何如？”聞者以為知言。

李元膺早負才名，詩句精巧，蔡太師京深知之。蔡在翰苑，嘗因錫宴西池，失脚踏水，幾至沒溺。元膺聞之，笑曰：“蔡元長都濕了肚裏文章也。”蔡聞之大怒，卒不得召用而卒，士論惜之。

薛昂言白督耨初行於都下，每兩值錢二十萬。蔡京一日宴執政，以盒盛二三兩許，令侍姬捧爐巡執政坐，取焚之。至尚書右丞范致虛，取盒盡傾入懷中，姬持空盒還白京，欲勸右丞一杯，京許之。姬取玉斗注酒飲致虛，致虛辭之，姬以手開衣領，傾納懷中，其香俱敗。

崇寧中，蔡太師行當十錢，章縝坐私鑄文面編置，人多言其枉。政和間，上皇命改右列為閣門官，或勸縝用藥除字，縝曰：“面已文矣，終不齒於縉紳，止欲注其下曰：太師錯。”或調之曰：“若注且湏聞官，慎勿私注也。”

蔡京崇寧中以星文罷相，般出觀音院待罪。客有過之者，京泣曰：“京若負國，即教三子都沒前程。”好事者戲云：“兩行珠淚下，三箇鳳毛災。”

崇寧以後，王氏《字說》盛行，學校經義論策，悉用《字說》。有胡汝霖者荅用武策，其畧云：“止戈為武，周王伐商，一戎衣而天下大定。歸馬放牛，偃武修文，是識武字者也。尊號曰武，不亦宜乎。秦始皇、漢武帝、唐太宗既得天下，而窮兵黷武不已，是不識武字者也。”榜出，遂為第一，雖用《字說》而有理。

大觀四年之冬，冊立鄭貴妃為皇后，時翰林學士范公致虛當制。明日，宰相何公執中奏陳制書不工，上令何公改為之，腦語云：“天地奠位，二氣合而萬物生。日月並明，四時叙而百度正。”蓋是改易王荊公拜相，麻元公絳所作者。范公不能平，上章極論其非，且云：“聖朝立后，當用新意。不當蹈襲前人，海行舊語，至兢至慎，不敢妄措詞。若今來臣僚撰到麻制，以天作之合，對王假有家。臣所以不敢蹈襲而語者，以其係立靖和皇后制語也。又若惟乂乃濟，對非初其艱。臣所以不敢蹈襲而語者，以其係立瑤華孟后制中語也。凡此之類，謂宜避忌貼黃，云人臣之事君與后，猶人子之事父與母也。事有不便於父母而子不言，是不子也。”范公坐是竟

得罪外補，而禁中終以後制有靖和與瑤華兩對為忌諱，仍舊用范所草制詞。

張公天覺，政和初召還，俄拜右相，薦引所知布列要路。未幾為讒譖所擠，斥逐殆盡。公尋亦罷相，再貶峽州。中途至于僧寺，有千手眼大悲觀音塑像。公題長韻於壁，其畧曰：“靈山會上別世尊，各以願力濟羣生。子勿謂我徒經營，手眼太少難支撐。”蓋言立朝寡助故也。

政和間，西夏國書誤用本朝廟諱，中書舍人潘兌作詔曰：“乃於邊鄙之文，犯我祖宗之諱。”張公商英時為宰相，令兌修改。兌又曰：“乃於為文犯我國諱。”張公乃自為改云：“至於為文，有失恭慎。”時皆服其得體。

給舍舊為一等，並服頰帶排方佩魚。元豐中有自侍即為夕拜者，故仍舊繫金帶。崇寧初乃援以為例，自是給事中並金帶矣。又殿中少監，故事亦頰帶佩魚者，禁省供奉之職故也。政和以後置大司樂，位殿少之上，乃援例頰帶，已失本意。後見明堂以頒政位，太常卿之上又援司樂例亦頰帶，皆非也。

宣和間，七夕召宰執近臣禁中賜宴。上曰：“七夕何故百司無假。”宰相王公黼對曰：“古今無假。”上為一笑，盖用柳耆卿七夕詞以對。

崇觀以後，以言為諱。宣和辛丑，策士偶詢時務，范宗尹肆言時忌，考官不取以策繳進，曰：“某字號語言涉異，合取聖裁。”上嘉其直，令依次第編排，而衆人終不敢置之前列。僅綴甲末而已。

毗陵有成郎中，宣和中為省官，貌不揚而多髭。再娶之夕，岳母陋之曰：“我女菩薩乃嫁一麻胡。”命成作詩，成乃摻筆大書云：“一牀兩好世間無，好女如何得好夫。高捲珠簾明點燭，試教菩薩看麻胡。”其女亦能安分隨緣，和鳴偕老，兒女成行，各以壽終。（案此條據《學海類編》增入。）

宣和間人材雜進，學士待制班常有數十人。乙巳之春開金明池，有旨令從官于清明日恣意遊宴。是夜不扃郭門，貴人競携妓女，朱輪寶馬駢闐西城之外。諸公仍羣聚賭博，達旦方歸。議者以謂：“上恩優渥如此，而身為從官，乃為賭錢漢，何也？”或荅曰：“非是從官為賭錢漢，乃是賭錢漢為從官故也。”

初，韓公忠彥、曾公布並為執政，蔡公京、曾公肇並為內相。一日召蔡鎖院草麻，拜韓左揆。蔡欲刺探上意，乃奏請曰：“麻詞未審合作專任一相，或作分命兩相之意。”上曰：“專任一相。”繼而宣召內翰草曾公右相麻，麻詞破題云：“東西分臺，左右建輔，盖有為也。”

宗正寺命宗室名，以字名相犯，故多用僻字，更無義理，而字多不識。每命一名，

即從書吏問釋音。有錢士始者為判宗，上皇眷遇，亦厚嘗，宣諭曰：“卿家私事，都無奏請，何也？”士始對曰：“臣別無干求，只乞聖恩為臣改名。”上笑而易之。

歐陽詢化度寺碑、虞世南孔子廟堂碑、柳公權陰符經叙，三公以書名三碑，又最精者。（案此條據《學海類編》增入。）

夏噩賢良家藏李太白墨迹十八字，云：“乘醉踏月，西入酒家。不覺人物兩忘，身在外。”太白書國朝諸名公跋於其後。

太祖皇帝既下河北，乘勝欲取幽燕，或以師老為言，太祖不能決。時趙中令留守汴都，走書問之。趙回奏曰：“所得者少，所失者多。非唯得少，之中猶難入手。又況失多之後，別有關心。”太祖得奏，即日班師。

董禹川濬長於四六，嘗有云：“八十日歸去來兮，九萬里搏扶搖者。”又云：“聲聞于天，方類在陰之鶴。時控于地，有同決起之鳩。”又云：“考父再命而僂，靡獲循墻。孟軻千里而來，敢云利國。”

有名士作謝及第啟云：“虎士開闕，徬徨紫禁。龍章在御，髣髴清光。”或曰：“此乃把見番人也。”

徐師川族兄少赴舉場，試圓壇八陞賦。援毫終日，不能下筆，乃大書試卷云：“圓壇八陞，八陞圓壇，既圓壇而八陞，又八陞以圓壇。八陞圓壇，既圓壇而八陞。圓壇八陞，又八陞以圓壇。”榜出，陽為失意之狀。或調之曰：“有司不明，固可罪然。吾兄所以被黜，正由小賦中不見題故也。”至今人傳以為笑。

李賓王利用，鄱陽人，躬行君子人也。又善相，嘗云：“郭林宗作《玉管通神》，有四句云：‘貴賤視其眉目，智慧察其皮毛。（案《學海類編》智慧作安否。）苦樂觀其手足，貧富觀其頤頰。’”

佛印禪師為王觀文陞座云：“此一瓣香，奉為掃煙塵博士、護世界天王、殺人不眨眼上將軍、立地成佛大居士。”王公大喜，以其从帥多專誅也。

白雲端長老厥初禪理未契，因觀弄獅子戲，忽翻袈裟，蒙身跳躍，作獅子態，叢林號為“端獅子”。